

Autor i/ili nosilac autorskog prava \_\_\_\_\_, sa pseudonimom \_\_\_\_\_, te sa adresom prebivališta \_\_\_\_\_, i brojem identifikacionog dokumenta \_\_\_\_\_ (u nastavku „autor“) i „Asocijacija kompozitora – muzičkih stvaralaca“, Trg solidarnosti 2a, Sarajevo, BiH, ovlaštena rješenjem br. IP-03-47-5-12-06059/12VT Instituta za intelektualno vlasništvo Bosne i Hercegovine od 21. 06.2012. godine na kolektivno ostvarivanje prava autora muzičkih autorskih djela (u nastavku „AMUS“) su dana \_\_\_\_\_ godine u \_\_\_\_\_ zaključili sljedeći

## **UGOVOR O KOLEKTIVNOM OSTVARIVANJU AUTORSKIH PRAVA AUTORA MUZIČKIH DJELA OD STRANE AMUS-A**

### Član 1.

Svrha ovog ugovora jeste uređenje pravnih odnosa ugovornih strana povodom kolektivnog ostvarivanja autorskog prava u vezi svih muzičkih autorskih djela autora – nosioca autorskog prava od strane AMUS-a.

### Član 2.

Autor isključivo, cjelovito i bez sadržinskih ograničenja, a povodom svakog individualnog muzičkog autorskog djela povodom kojeg je nosilac relevantnog prava, bez izuzimanja bilo kojeg djela, u okviru i ograničeno obimom djelovanja na koji je AMUS po bilo kojoj pravnoj osnovi ovlašten, prenosi na AMUS svoja imovinska autorsko-pravna ovlaštenja koja proizilaze iz:

- a) prava saopćavanja javnosti;
- b) prava javnog muzičkog izvođenja;
- c) prava javnog scenskog prikazivanja;
- d) prava javnog prenošenja;
- e) prava javnog saopćavanja s fonograma i videograma;
- f) prava radiodifuznog emitiranja;
- g) prava kablovskog emitiranja;
- h) prava radiodifuznog reemitiranja;
- i) prava kablovskog reemitiranja;
- j) prava sekundarnog korištenja djela koje se radiodifuzno ili kablovski emitira odnosno reemitira;
- k) prava činjenja dostupnim javnosti djela;
- l) prava reproduciranja;
- m) prava distribuiranja;
- n) prava davanja u zakup;
- o) prava prerade i
- p) prava audiovizuelnog prilagođavanja.

Autor prenosi ova ovlaštenja na AMUS za cjelokupno vrijeme dok je ovaj ugovor na snazi.

Autor se obavezuje da će po objavljivanju muzičkog autorskog djela ili po naknadnom sticanju po bilo kojoj pravnoj osnovi relevantnog autorskog prava povodom muzičkog autorskog djela, ne kasnije od 30 dana, putem obrasca koji će AMUS na svojoj službenoj internet stranici obezbijediti autoru, AMUS-u prijaviti takvo muzičko autorsko djelo i da će ta prijava predstavljati manifestaciju pravno relevantne volje autora da se na AMUS prenesu sva prava iz ovog člana sa karakteristikama tog prenosa iz ovog člana povodom prijavljenog muzičkog autorskog djela.

Autor preuzima na sebe cjelokupnu materijalnu, imovinsku, pravnu te bilo koju drugu odgovornost za sve i bilo koje pravne nedostatke ovlaštenja koje prenosi na AMUS.

Autor se obavezuje da će AMUS obavijestiti o svim eventualnim prethodnim raspolaganjima ovlaštenjima koja prenosi na AMUS i da će AMUS obavijestiti o svim ugovorima o narudžbi ili korištenju svojih djela.

Autor se obavezuje obavještavati AMUS o svim podacima koji su na bilo koji način u vezi sa kolektivnim ostvarivanjem autorskih ovlaštenja koja je prenio na AMUS, uključujući obavještavanje o promjenama ličnih podataka (adresa, pseudonim itd.), te da će AMUS-u pružiti svu razumnu pomoć pri kolektivnom ostvarivanju autorskih prava po pisanom zahtjevu od strane AMUS-a.

Autor prenosi ovlaštenja iz ovog ugovora na AMUS bez prostornih ograničenja bilo koje vrste za vrijeme trajanja ovog ugovora, osim ako autor nije obavijestio AMUS u ovom ugovoru ili za vrijeme njegova trajanja na zasebnom pisanom dokumentu predatom AMUS-u, da je ovlastio drugu kolektivnu organizaciju u drugoj državi da u toj državi vrši kolektivno ostvarivanje autorskih prava autora, u kom slučaju autor prenosi ovlaštenja iz ovog ugovora na AMUS bez prostornih ograničenja osim za konkretnu državu koju je naveo. Autor može upisati izuzeće/teritorije države gdje uživa zaštitu druge kolektivne organizacije:

\_\_\_\_\_.

U ovakvom slučaju je autor dužan obavijestiti drugu kolektivnu organizaciju ili druge kolektivne organizacije o ovlaštenju za zastupanje koje je dao AMUS-u.

Autor opunomoćuje AMUS da kolektivno ostvaruje, te čini bilo koje drugo djelovanje koje je u vezi sa kolektivnim ostvarivanjem prenesenih ovlaštenja, kako u Bosni i Hercegovini, tako i bilo gdje u inostranstvu gdje je AMUS ovlašten. Autor je saglasan da potpisana Pristupnica AMUS-a, koja sadrži sve bitne podatke o autoru, čini sastavni dio ovog ugovora.

#### Član 3.

AMUS se obavezuje da će kolektivno ostvarivati autorska ovlaštenja autora koja je autor prenio na AMUS, pod jednakim uslovima pod kojima kolektivno ostvaruje autorska prava svih drugih autora koji su prenijeli autorska ovlaštenja na AMUS, te inostranih autora na osnovu relevantnih ugovora i zakona, te da će kolektivno ostvarivati autorska prava u skladu sa svim primjenjivim zakonima, međunarodnim ugovorima, općim aktima te odlukama tijela AMUS-a, u dobroj vjeri i primjenom dobrih poslovnih običaja iz domena kolektivnog ostvarivanja autorskog prava povodom muzičkih autorskih djela.

Autor opunomoćuje, a AMUS se obavezuje da će u svoje ime a za račun autora, u skladu sa načelima prethodnog stava:

- a) sklapati pojedinačne ugovore o neisključivom prenosu relevantnih prava korisnicima za korištenje autorskih djela autora, koji će činiti repertoar kolektivne organizacije pod jednakim uslovima za iste vrste korisnika, za iste vrste djela i za iste načine korisnika, sukladno relevantnim odredbama zakona;
- b) sklapati kolektivne ugovore sa reprezentativnim udruženjima korisnika o uslovima za korištenje autorskih djela;
- c) objavljivati usaglašenu tarifu o visini naknade za korištenje autorskih djela i upoznavati korisnike sa visinama tih naknada;
- d) vršiti naplatu naknade za korištenje autorskih djela;
- e) vršiti raspodjelu naplaćenih, odnosno primljenih naknada autorima prema unaprijed određenim pravilima o raspodjeli;
- f) vršiti kontrolu nad korištenjem autorskih djela koja čine repertoar AMUS-a;
- g) pokretati i voditi postupke zaštite u slučaju povrede prava koja ostvaruje, odnosno ovlaštenja koja su prenesena na AMUS kod sudova i kod drugih nadležnih državnih organa ili kod drugih međunarodnih ili domaćih nadležnih organa;
- h) sklapati ugovore sa stranim kolektivnim organizacijama i njihovim udruženjima;
- i) vršiti sve druge aktivnosti na koje je AMUS ovlašten pozitivnim pravnim propisima kojima se uređuje materija kolektivnog ostvarivanja i materija zaštite autorskih prava, odnosno sva druga djelovanja koja su izravno ili neizravno u vezi sa kolektivnim ostvarivanjem autorskog i srodnih prava, a u skladu sa zakonom.

AMUS se obavezuje da će autoru raspodijeliti dio ostvarenog prihoda za korištenje repertoara AMUS-a u visini koja je utvrđena usvojenim pravilima o raspodjeli prihoda kolektivne organizacije, u skladu sa Statutom i odlukama relevantnih tijela AMUS-a, te sukladno načelima srazmjernosti, primjerenosti, i pravičnosti te bez bilo kakve proizvoljnosti i transparentno, efikasno u skladu sa pozitivnim propisima kojima se uređuje kolektivno ostvarivanje prava i kojima se uređuje zaštita autorskog i srodnih prava i dobrim poslovnim običajima.

AMUS je saglasan da zaključenjem ovog ugovora autor postaje članom AMUS-a, sa svim pravima i odgovornostima koji istom proizilaze na osnovu vrste članstva autora iz Statuta AMUS-a, te na osnovu relevantnih zakonskih odredbi.

#### Član 4.

Ovaj ugovor se zaključuje na vremenski period od 5 (pet) godina. Poslije isteka trajanja ugovor se može neograničeno produžavati na iste periode.

Svaka ugovorna strana može otkazati ugovor, u cjelini ili djelimično pisanim putem. Otkaz ugovora stupa na snagu po isteku kalendarske godine u kom je dat.

#### Član 5.

Ugovorne strane su saglasne da će eventualne probleme u vezi sa ovim ugovorom u dobroj vjeri i savjesno riješiti pregovorom, te po potrebi medijacijom. Ukoliko stranke ne budu u stanju primjenom prethodno ugovorenih metoda riješiti nastale probleme ugovara se nadležnost Opštinskog suda u Sarajevu.

Ovaj ugovor se sačinjava u 3 (tri) primjerka, od kojih po jedan primjerak zadržava svaka ugovorna strana, a jedan primjerak se dostavlja, sukladno obavezi AMUS-a, Institutu za intelektualno vlasništvo Bosne i Hercegovine.